

ORDENANZA REGULADORA DE PREZO PÚBLICO POLA PRESTACIÓN DE SERVICIOS E REALIZACIÓN DE ACTIVIDADES DE CARÁCTER DEPORTIVO, CULTURAL, RECREATIVO, DE OCIO E TEMPO LIBRE E EVENTOS DE CARÁCTER FESTIVO.

ARTIGO 1º. FUNDAMENTO LEGAL E OBXECTO.

Segundo o previsto no artigo 127, en relación co artigo 41, ambos os dous do Texto Refundido da Lei Reguladora das Facendas Locais, aprobado por Real Decreto Legislativo 2/2004, do 5 de Marzo, o Concello de A Pobra de Trives establece prezos públicos pola prestación de servizos e a realización de actividades, que se regulan polo disposto nos artigos 41 a 47 da citada lei; pola lei 8/1989 do 13 de abril de Taxas e Prezos Públicos e polo que se preceptúa na presente Ordenanza Reguladora do Prezo Público por prestación de servizos e realización de actividades de carácter deportivo, cultural, recreativo, de ocio e tempo libre e eventos de carácter festivo.

Os prezos públicos que se esixirán ao abeiro desta Ordenanza serán pola prestación dos seguintes servizos e actividades:

- Actividades deportivas.
- Actividades culturais: cursos e obradoiros.
- Actividades recreativas, de ocio e tempo libre: excursións, andainas, campamentos de verán e outros semellantes.
- Eventos de carácter festivo: Festa da Bica e semellantes.

ARTIGO 2º. OBRIGADOS AO PAGO.

Están obrigados ó pagamento do prezo público as persoas físicas, xurídicas e entidades do artigo 35 da Lei Xeral Tributaria que se beneficien das actividades ás que se refire a presente Ordenanza, sempre e cando sexan organizadas polo Concello de A Pobra de Tives.

ARTIGO 3º. XESTIÓN DO PAGO.

1.- Na prestación de servizos ou realización de actividades de carácter deportivo, cultural, recreativo, de ocio e tempo libre o pago realizarase no momento

no que se confirme a admisión na actividade previamente solicitada despois da correspondente convocatoria. O pagamento realizarase por anticipado, mediante aboamento nas contas operativas do Concello en entidades bancarias no prazo e forma que a convocatoria determine.

Cando a actividade se divida en períodos mensuais o pagamento realizarase do seguinte xeito:

- No momento da inscrición na actividade aboarase o custo do primeiro mes.
- A partir do segundo mes, o pagamento do prezo realizarase mensualmente nos primeiros dez días de cada mes mediante domiciliación bancaria.

2.- No caso de eventos de carácter festivo o pagamento do prezo público realizarase simultaneamente á entrega da entrada ou ticket.

ARTIGO 4º. TARIFAS.

De conformidade co establecido no artigo 47.1 do Real Decreto Legislativo 2/2004, do 5 de Marzo, polo que se aproba Texto Refundido da Lei Reguladora das Facendas Locais, e no artigo 23.2.b) da Lei 7/1985, do 2 de abril, de bases do réxime local, delégase na Xunta de Goberno Local a competencia para a fixación das tarifas dos prezos públicos para cada unha das actividades ou servizos aos que se refire esta Ordenanza.

O acordo será motivado e conterá, como mínimo, os seguintes datos:

- Descrición da actividade que motive o seu establecemento.
- O importe do prezo público.
- A declaración expresa, se é o caso, da concorrencia de razóns de tipo social, cultural, benéfico que xustifique a fixación do importe do prezo público por debaixo do custo da actividade ou servizo, o que terá carácter absolutamente excepcional, por mor da necesidade de garantir o custo efectivo do servizo ou actividade .No caso de aplicarse bonificacións de interese social por causas obxectivas, será preciso informe social dos servizos sociais do Concello.

-No expediente de fixación do importe do prezo deberá figurar un estudo económico no que se indique o custo do servizo ou actividade.

ARTIGO 5º. DEVOLUCIÓN.

Cando por razóns non imputables ao obrigado ao pago do prezo, o servizo non se preste ou a actividade ou evento non se desenvolva, procederá a devolución do importe aboado. Esta devolución efectuaráse de oficio.

ARTIGO 6º. NORMAS DE APLICACIÓN SUPLETORIA

Para os aspectos non regulados na presente Ordenanza serán de aplicación as normas contidas no Real Decreto Legislativo 2/2004, polo que se aproba o Texto Refundido da Lei Reguladora das Facendas Locais, e demais normativa aplicable.

DISPOSICIÓN FINAL.

Esta Ordenanza, unha vez aprobada definitivamente polo Pleno, publicarase no Boletín Oficial da Provincia de Ourense e entrará en vigor ao día seguinte da súa publicación e permanecerá vixente ata súa modificación ou derogación expresa.

A Pobra de Trives, xaneiro de 2016